

B.H. 369, 21.

BREVIS DELINEATIO  
VENATUS

II n  
3123

Quem  
*Serenissimus ac Celsissimus Princeps &  
Dominus*

DN GEORGIUS  
WILHELMUS,

Dux Braunsuicensis & Luneburgensis Dn. noster  
Clementissimus, in sylvis Ducatus Calenbergensis  
instituit, mensibus Augusto & Septembri,  
Heroico carmine concepta.

a  
M. LAURENTIO CULEMANNO, P. L.  
Cæs. Ecclesiæ Nettelrodano in Præfessione  
Leonoviensi,



HANNOVERÆ,  
Typis GEORGII FRIDERICI GRIMM  
Anno 1564.



*Notissimo in  
Wittenberg h... H. J. 9  
Anno*





*Serenissimo ac Potentissimo Principi ac  
Domino*

**DN. GEORGIO WILHELMO,**  
Duci Brunsvicensi & Luneburgensi Domino  
suo clementissimo.

**S**alve! Salve HEROS! salve Celsissime PRINCEPS,  
Perfugium Templis, portus & aura Scholis.  
Accipe gratanti Clemens mea carmina vultu,  
Illaq; clementi suscipe quæso manu.  
Tu Musas constanter amas, carasq; tueris,  
Officium sancti gnarus id esse ducis.  
Cur igitur Te non redament, celebrentq; colantq;  
Et sublime tuum nomen ad astra ferant.  
Vive diu Dux longa vâ dignissime vitâ,  
Utq; diu TIBI sit vivida vita, precor.

Illustriss. Gelf. V.

subiectissimus & devotissimus

M. Laurentius Culemannus.





Mphitryoniadis tergo qui sustulit orbem

Immensum, domuitq; feras, immania versu,

Facta canant alii; numerisq; gravioribus ornent

Dulichium ve Ducem, mediis in fluctibus, alto  
 Per duo lustra mari vagus huc qui erravit & illuc,  
 Multa mari & passus terrisq; incommoda multa.  
 Me juvat exiguo VENATUM scribere versu;  
 Ergo quid Aonidum interea soror æmula cæptas.  
 Quid juvat aprico patulæ sub tegmine lauri,  
 Tarda quies? surge & melioribus utere pennis,  
 Alta pete atq; humiles jam dudum despice curas,  
 Ingreditor sylvam, ramisq; sub arboris altæ  
 Capreolos graciles, fulvas venabere damas,  
 Et lepores timidos salicum nemus inter amænum.  
 Ast labor hic magnus, magnusque hoc carmine cursus;

Propos-  
tio,

Tu mihi Christe Deus, vasti Deus arbiter orbis,

Invoca-  
tio.

Cujus non frustra colitur venerabile Numen,  
 Imploratus ades, dextras mihi suffice vires,

A 2

Numine





Numine subveniasque tuo, calamumque gubernas,  
Tu vero HEROU M soboles, prægrandeque fulcrum  
Imperii, Princeps, decus atque GEORG- GUILIELME  
Brunsuigicæ domus & vertex & fulgida stella,  
Tu PROAVIS, ATAVISQUE potens; Est stemma vetustum,  
Unde genus ducis, genus alto è sanguine Regum,  
Da facilem cursum ac audacibus annue cæptis.  
Sol qui flammiferis mundum complexus habenis  
Volvis inexhausto redeuntia secula motu:  
Splendide Phœbe parens, ampli lux publica mundi,  
Mundi oculus, vitæ pater & fons lucis origo  
Purpureæ, per quam cœli convexa tuemur  
Discussis tenebris, tu certâ errantia lege  
Sidera, Rex medius, mirâ ratione gubernas;  
Tu lucis, noctisque vices, tu frigus & æstus  
Omnia tu miti, ceu temporis auctor & anni,  
Temperie motuque regis, moderamine certo  
Sparge diem meliore coma trinemque repexi  
Blandiùs elato surgant temone jugales,  
Efflantes roseum frenis spumantibus ignem,  
Expectata diu jam tandem gaudia portas.  
Vos ô quæ gelidos saltus umbrasque viuentes,  
Gratorum nemorum, quæ rosca rura Napeæ  
Najades colitisque hortos & flumina, Musis

Cognita



Cognita! Quæ colles lætos flaventiaque arva  
Curatis, quò vitetis nunc sideris æstum  
Ferventis, mecum hac fessæ requiescite in umbra,  
Et vigili patulos indagine cingite montes!  
Vos Dryades pulcræque DUCI nova texite lecta,  
E molli violâ è ferrugineis hyacinthis;  
O Musæ simul & sociæ prosperate Camœnæ  
Per virides lucos, perque avia lustra ferarum,  
Non hic Pierii cantus, non carmina desint,  
Advertante DUCE! en summis jam collibus offert  
Sese læta Diana ferens pia pübila plausu.

Jamque rubescebat radiis circumfluus æther  
Sol rutilo roseisq; rotis fulgebat olympo,  
Et vigil interea nitido patefecerat ortu,  
Purpureas aurora fores & noctis aquosæ  
Lampade subdubiâ nigras disjecerat umbras,  
Dispuleratq; polo stellas, quarum agmina cogit  
Lucifer, atque diem veniens prænunciat alnum;  
Mollibus è stratis se matutinus agebat  
Illustris DUX HANNOVERA exit sidere fausto  
Venatum, simulac unâ delecta juvenus,  
Retia rara, plagæ, lato venabula ferro,  
Quin multiq; ruunt equites, & odora canum vis,  
In nemus ire parant, saltusq; indagine cingunt.

Narratio.



Stat sonipes, ac frena ferox spumantia mandit,  
Indomitusq; fremit, generosaq; colla reflectit,  
Exacuit bilem contorto verberè caudæ  
Mox immane furit, mox vires colligit omnes,  
Arduus auratis phaleris exasperat aures,  
Accipit & pulchros cultus, & crine superbus  
Erecto, fulvum spumis perfundit & aurum  
Luxuriat tumido gemmata monilia collo,  
Nobilis auratos mox purpura vestit & armos.  
Tandem progreditur magna stipante caterva  
Nobilium, PRINCEPS, clari multiq; potentes  
Magnates, virtute viri illum ritè sequuntur  
Et servi & famuli fidi stipantq; frequentes  
HEROEM magno strepitu, fulvoq; nitentem  
Auro, splendentemq; armis, gemmisq; coruscum.  
In sylvam postquam nunc vectus Dux GUILIELMUS  
Pervenit ad montes altos ac invia lustra  
Tunc trepidant alæ, nemoraq; indagine lustrant:  
Ecce feræ saxi dejectæ vertice capræ  
Decurrere jugis: aliâ de parte patentes  
Transmittunt cursu campos atque agmina cervi  
Pulverulentâ fugâ glomerant, montesque relinquunt;  
Ast ubi venator deprensû viscera cervi  
Quem clamore premens, canibusque ad retia pulsum

Stravit



Stravit humi multo fundentem sanguine vitam,  
Eugè, Eugè, ingeminans canibus partitur anhelis,  
Illi inter sese certantes rapta revellunt,  
Mordicus & rostro discerpunt frustra cruento,  
Obnixæ ardentes villisque horrentibus urgent.  
Sunt latebræ & saltus variarum & lustra ferarum  
Digna cani, & colles passim venatibus apti;  
Quos longè repleas inflatis cornibus acer  
Latratuq; canum quoq; motu & vocibus altis:  
Jam cuicumque placet studia exercere **DIANÆ**  
Adsit & imbellem damam, capreasque fugaces  
Venari poterit toto lætissimus anno,  
Sunt etiam sylvæ, quas ingens pondere septum  
Cingit, ubi lepores, vulpes, fulvæ capreæque  
Agmina cervorum ramosa gerentia fronte  
Cornua ibi magno numero studio capiuntur,  
Hic est frondosus lucus venatibus aptus,  
Hic juvat æstivos ortus vitare sub umbra,  
Hic venatores feriunt rigidosque luposque,  
Atque student pavidis prætere retia cervis,  
Ac duro spumantem aprum prosternere ferro.  
Quin alii valles solerti indagine lustrant,  
Atque canes diris flagrant latratibus ipsi.  
Et simul immanes ursi, immania monstra,

Hinc



Hinc dantur letho sylvis habitantia amœnis;  
Idcirco nunc conspicuus venatus amœnus  
Et sylvæ illustres recreant indagine curas,  
Nam validi venatores hic ardua sylvæ  
Lustra petunt, canibusq; feras sectantur agrestes.  
Hic vestigatus pavidis expulsus ab umbris,  
Per saltus & opaca loca, umbrososque recessus,  
Per dumeta, fugit ramosus cornua cervus  
Implicitusve plagis, campove agitated aperto,  
Non fallente manu celeri transfigitur ictu.  
Capreolusve levis saltu superare præalta  
Retia molitur, celeri retrahente molosso,  
Aut dentatus aper devastans roscida rura  
Conclusus lustris, multis latratibus actus,  
Tandem illum figit venator cuspide acuta.  
Quin etiam nemorū studiosus tempora quercu  
Cincta gerit, latoque tenens venabula ferro,  
Aut cervos aut figit apros, comitantur euntem  
Riphæique canes, armillatique molossi;  
Impiger ex humeris pharetram suspendit & arcū  
Solertique altos cingens indagine montes  
Militat in sylvis, rigidisque irascitur urfis,

Et



Et foribus rictus præfiget & horrida terga. (tō  
Surgere quādo solet, tunc hunc comitantur eun-  
Asterion, Laconq; canes : ille undique ramis  
Ilice decisis altâ prope flumen amænum,  
Tela sagittiferis suspendit clausa pharetris,  
Et picturatos, famulus quos gesserat, areus  
Subligat, & jacula & pedicas, & tortile cornu.  
Ut lepores timidos hirsuto vepre latentes  
Præteream, quos turba canū circumsona profert,  
Æstus erat, mediusq; dies, & fessa per omnes  
Captabant valles animalia frigus opacum,  
Alicuumq; genus, ripæque, amnesque silebant;  
Interea molli residens in gramina Princeps,  
Post requiem surgit nemora inter frondea lustrat  
Per viridos saltus, perque avia lustra ferarum  
Incedens, Dryadum secretos audit amores,  
Atque per umbriferæ nemorosa cacumina sylvæ  
Setigeros prosternere apros sylvisq; vagantes  
Æripedes cervos, urfosq; agitare feroces,  
Et lepores pavidos & fulvo tergoe damas,  
Impendit curasque feras tum captat agrestes.  
Ante DUCEM vero clangebant æra tubarum  
Cum quibus & rauco castrensia tympana pulsu

B

Mota,



Mota, dabant sonitumq; fremebāt omnia plausu,  
Dulcia vivifico sonuerunt cornua cantu,  
Buccinaq; insonuit quoq; fistula concava blanda.

Jamq; dies coelo cessit, quò nocte rubentes,  
Cynthius intorquet currus, orbemq; relinquit,  
Et pater hesperio flagrantem gurgite vultum  
Abdiderat, Titan aliis rediturus ab undis.

Tunc dicebat PRINCEPS Clementissimus HEROS,  
Vesper adest famuli nodosa reffigite lina,  
Humidaq; ad Boream suspendite, non benè lunæ  
Creditor hoc primum: sed cum prænuncia lucis  
Fulserit exoriens aurora, revisite sylvas;  
Nam mihi nocte magis latos obsidere campos,  
Insidiisque placet dumofas claudere valles,  
Cum terræq; fretumq; silent micat Arcadis Ursæ  
Sidus & argutis circum tremit ignibus æther.

Tandem castellū ingressus venerabilis HEROS,  
Venatu longo, fessusque ambage viarum,  
Componit lecto corpus precibusq; serenis,  
Seque suasq; vias toto de corde Jehovæ  
Comendat, placidamq; petit per membra quietē.

Postera vix coelo stellas dimoverat Eos,  
Sidereus nitido radiabat lumine Titan,  
Et jam protulerat totum sol aureus orbem Con-



Conspicuoq; diem revelabat clarior axe.  
Tunc PRINCEPS animo per noctē plurima volvēs,  
Ut primum lux alma data est; en exiit illinc,  
Nec mora; conscendit suctâ gravitate caballum,  
Mane novo densos saltus, sylvasq; virentes  
Ingreditur, passim resonant arbuſta canoro  
Garritu volucrum & variæ concentibus aure,  
Hic ignota viret platanusque, hic plurima Pinus  
Nascitur, hic abies patuloque cacumine fagus,  
Pomus ibi atq; pyr<sup>o</sup>, Dryadū domus ardua querc<sup>o</sup>,  
Atq; eadem quoq; sacra Jovi coryliq; nucesq;  
Fraxinus & cerasus curvataq; glandibus Ilex,  
Ornus Juniperus, I axus philæque frequentes,  
Betula & in cœlum cono exporrecta cupressus,  
Et virides piceæ, tiliæq; fragrantibus auris.  
Mille avium species implebant murmure sylvā,  
Et liquidum vario feriebant æthera cantu.  
Hic cervi timidi passim, capræq; fugaces  
Æstivum viridi captabant frigus in umbra.  
Ad Ducis adventum gaudebant frondea rura,  
Gaudebant sylvæq; leves in montibus umbræ  
Ipsæ convalles, ipsa hæc arbuſta sonabant  
Et montes colles virides assurgere certant.



Fictio.  
poëtica.

Gaudebant undæ gaudebant Naides undæ  
Spirabant tenues Zephyri, blandæq; volucres,  
Dulcissimo cantuque DUCEM Dominumq; salutant.  
Ad DUCIS adventum croceis jam florida bigis  
Invehitur CHLORIS roseo nitidissima vultu  
Illius aureoli pendent è vertice crines,  
Purpureo ornati violæ florentis honore :  
Fons, oculiq; nitent radiis & luce serena :  
Lilia mixta rosis malas & tempora pingunt :  
Labra venustatis rident perfusa lepore :  
Palla viret variis distincta coloribus : Ecce  
Spargit humi varios, fertur quacunq; colores,  
Quaque movet gressus surgunt violæq; rosæque,  
Corinthique croci, atque immorales amaranthi,  
Candida nec niveis celsura ligustra pruinis,  
Ipsæ etiam Charites socio simul agmine fundunt,  
Certatim illa thymum, roremque & molle cyperon,  
Hæc casias, calthasque, hæc & vaccinia nigra,  
Narcissi & lacrymas, hyacinthi & nobile gramen  
Et thymbraam & quot nunc tellus fert dædala flores.  
Has inter succincta sinus, redimita papillas,  
Et roseum spirans fragranti vertice odorem,  
Errat nuda genu per florida prata DIANA,  
Cui volitant flavi per candida colla capilli,  
Ad frontem aurato religat quas fibula nexu.  
Hæc lætatur, lætanti risusque jociq;

Affili;



Affiliunt somniq; leues & mollior aër;  
Ver halat Zephyris mulcent spirantibus auræ;  
Incustoditæ ludunt per gramina Nymphæ,  
Otia cantantes promunt ignava camæna.  
Naiades hîc Dryadesq; habitant, & sole cadente  
Annosam circum quercum ramosq; comantes  
Instituuntque choros vicino & fonte levantur,  
Ipsa VENUS nitido texebat pollice sertum,  
Ac niveis virides miscebat floribus herbas;  
Quas neque contigerant immitis frigora brumæ,  
Fervidus ardent i neque sol exusserat igne.  
Formosæ summis de montibus undiq; MUSÆ  
Conveniunt, secum cœlestia dona ferentes  
Ambrosiæ succos, gemmas, præriosaq; ferta,  
Aurea vernanti surgebant lilia campo,  
Sparguntur passim è calathis violæque rosæque,  
En quoque mille ferunt niveæ suaserta puellæ,  
Serta auro intertexta & ramiferisque corallis,  
En totidem eois bacata monilia gemmis,  
Fulva auro variata smaragdo & jaspide tecta,  
Cujus nexa sonant pino conchylia limbo.  
Quin & Pieridum chorus apparat omnis honores,  
Hunc Dryadesq; colunt, hunc jam venerantur, amantq;  
Nymphæ, quin virides cantant per prata Napææ,  
Depositâq; ipsi Faumi feritate bicornes,  
In sylvis resonant Musas, Phœbum atque Minervam.



Imis argutus redit è convallibus Echo?  
Inque altis cantat sylvis revolubilis Echo?  
Et vivæ reboant sylvæ, montesque resultant;  
Ipsæ autem saliant pecudes & cornua tentant,  
Lætæ agitantque jocos: pars dulcia pabula carpit,  
Pars procumbit humi, celsas pars arrigit aures  
Immemor herbarum & miratus carmina secum:  
Floribus omnigenis tellus arridet eunti,  
Atque simul virides ludunt armenta per herbas,  
Rupes & montes imis dant signa cavernis  
Lætitiæ cantuque DUCEM Dominumque salutant.  
Nec mora mirifico statim clangore tubarum,  
Antra resalutabant latè collesque fremebant,  
Et Nymphæ junctis manibus per rura chortas  
Lætæ agitant, agitant plausus & júbila in ipsis  
Sylvis, Sylvani bibuli, satyrique jocosí.  
Consonat omne nemus strepitu risuque soluto,  
Vicini colles grato clamore resultant,  
Carbasa plena volant Zephyri spiramine blando.  
Denique gratantes venti, vallesque recurvæ  
Plauserunt, plausère auræ, plausère volucres,  
Formosæ Veneres illic & Phyllides errant.  
Omnis Hamadryadum chorus & blandæq; Cameræ  
Plaudunt & virides densant umbracula quercus,  
Inflatisq; leves Fauni modulantur avenis  
Carmina, moxq; DUCI gratantur ovantibus undis.

Lataque



Lætaque se vario tellus hic flore coronat,  
Arboris & densæ præbent umbracula frondes,  
Mille voluptates aliæ sunt commoda mille  
Sylvarum: blandi strepitant in frontibus Euri,  
Et Zephyri flatu grato, tenuiq; sulurro  
Invitant somnos & delectamina præstant,  
Et vos montivagi pastorum numina Panes  
Et nemorum colitis qui tesqua virentia Fauni  
Et vos monticolæ tantarum in munere laudum  
Cingite fronde comas, celsi viridantia DEISTRI  
Rumpite & HEROI lætum pæana canentes,  
Præcipitate moras omnes, rubet aurea phœbe,  
Cingite Io frontem ter Io sacra cingite lauru  
Tempora ruricolæ myrtho pimpleide crines  
Nectite hyperborei diffusos turbine flatus,  
Laudisonis molles plectris cytharæq; sonoræ,  
Nunc aptate manus, numerisq; sonantibus ora,  
Plaudite Mnemosynem, frontes adducite lætas,  
Thespiades Musæ dulces modulaminor hymnos,  
Atque Duci illustri date dulcia munera laudum.  
Jubila Melpomenes gratissima fundite gratæ,  
Hinc psallat Cleio, dulcis Polymnia cautu,  
Atq; Duci tribuat nunc carmina docta Thalia;  
Et vos DEISRIADES pia carmina dicite MUSÆ,  
Vos HALLERBROCENSES carmina pangite MUSÆ  
NETTELBERGIACÆ vos carmina fundite MUSÆ,  
Vos



Vos SOLLINGENSES pia carmina ducite MUSÆ,  
Vos LINSBURGENSES pia carmina nec tite MUSÆ,  
Plaudite vos pueri teneri, vegetæq; puellæ,  
Quin etiam variis de collibus undique MUSÆ |  
Spargite humum teneris viridantia floribus arva,  
Idaliasq; rosas & vivaces Amarynthos,  
Et Menthas molles & odoriferas calaminthas  
Ambrosios succos virides herbasque Thymumque.  
Et quoque fragrantès rores, panchæaque thura  
Promite veris opes, calathis effundite plenis  
Lilia, pallantes violas, herbasque sacratas;  
Et patrias terrasque novo candore serenent  
Purpurei soles & amicæ splendida lunæ  
Sidera: tum mites auræ, ventique salubres  
Purgabunt latè corruptas aëris oras.  
Et simul ad LEINÆ vada fluminis aurea surgunt  
Citrea odoratis pendent mala aurea ramis;  
Ecce DUCI roseis se punica floribus arbor  
Induit & virides densant umbracula Lauri,  
Omne genus florum sequitur rosæ violæque  
Quod color egregius nec non fragrantia suavis  
Atque odor insignis commendat & inde repleta,  
Percipiunt patulæ nares & lumina nostra  
Gaudia, sollicitam interdum recreantia mentem.  
Ad DUCIS adventum surgunt quoque gramina multa  
Plantago, origanum, Narcissus & oxitriphillon

Thym-



Thymbra, Thymus, smilax, hyacinthus, Amarac<sup>o</sup>, ulva,  
Anthemis, Euphrasæq; simul, circæa, nigella,  
Tormentilla, minor Belis, majorq;, Lavendula, mentha,  
Salvia, Serpillum, Scolopendria, carriophylla,  
Parvula convalles depressas lilia complent,  
Candida, odorata & vario medicamine nota,  
Et florum vario fulgens regina colore  
Pubescit ROSA, plantarum decus annua terræ  
Gloria, florum oculus, rubor horti prima voluptas  
Languentis cerebri, situs telluris amænæ.  
Inclyte flos, rosa, tu foliisq; nites ô inclyta salve,  
O florum Princeps & mensis filia JunI,  
Sed neque jam cyanus, nec pseudomelanthion agris  
Deficiunt; hoc sanguineo spectabile limbo;  
Ille autem cœli, quando est sine nube, colore  
Conspicuus, gratusque oculis: sic lilia sylvas  
Purpureis ornant maculis distincta, nec hortis  
Corniculata aquileia deest & cœrula flore;  
Arva Chamæmelum & miniatum cranthemon implent  
Et Calthæ flave spirant & sidus agrorum  
Hortorumq; decus se pæonis herba rubentem  
Induit in florem, cujus cum murice certant  
Stamina, luteolique apices aurumve crocumve  
Exuperant fulgore rosæ; lanugine tectis,  
Folliculis siliquæ grana insunt æmula cœco,  
Sed Lybicas aliquis citius numeraret arenas,

Et



Et LEINÆ fluctus, flavi Vefarisq; procellas  
Quàm genera herbarum, quod multis nomina verbis  
Enumerare queat simul ullo effingere versu.

Nunc fere tempus erat quo DUX comitante caterva  
Innumerâ, famulis multis, moxibat ad urbem,  
Quæ læto ridebat ovans HANNOVERA vultu;  
Ad plateas mox turba ruit, pars fixa fenestras  
Occupat, illustrem comitatum cernere gestit,  
Pars limen tenet & venientem expectat ocellis,  
Pars aciem glomerans fulgentia suscipit arma,  
Loricamque capit, stellatosq; induit enses,  
Et vexilla manu regit atque per æthera vibrat.  
Pars & bombardas onerat imitata Tonantem  
Sæpe Jovem, medias ad nubes horrida mittit,  
Fulmina & æthereas jaculatur tela per auras.  
Arcem est ingressus PRINCEPS Celsissimus HEROS,  
VENATU dulci lassusque ambage viarum  
Aurato & pulcro ponit sua membra sedili,  
Quo revocet modò languentes in pristina vires;  
Magnifici Domini variataque júbila miscent.  
Buccina clara strepit, tarantara clangit acuta,  
Aëreasq; gravi sonitu citò verberat auras,  
Adventumque DUCIS signo prædicit aperto.  
Et jam permensus coelum sol occidit & jam  
Montibus è celsis majores suscitatur umbras  
Obscuratque ignes stellarum Luna minores.

NOX



Nox ruit & placidos jam suadent sidera somnos  
Jam secura quies letheæ papavera quassans  
Aëris immensi tractus & proxima lunæ  
Regna tenet, pelagique sinus terrasque jacentes  
Et volucrum genus omne silet, genus omne ferarum,  
Somniaq; humanas solantur inania curas,  
DUX sedet accumbens mensæ regaliter unus,  
Quem Proceres magni, præstolanturq; frequentes,  
Atque simul mediis parent convivium tectis:  
Convenere omnes strato discumbere in OSTRO  
Deliciis jussi & dapibus se inferre futuris,  
Stant oneratae epulis mensæ: stant aurea circum  
Pocula cum pateris: convivæ vina coronant,  
Asth fidi puras lymphas pro more ministri  
Dant manibus, totasque tenaci vellere siccant,  
Atria imaginibus pictisque ornata tapetis,  
Intus fulgentique nitent auro atque argento:  
Illic mille scyphi, gemmataque pocula stabant,  
Pondere vasta gravi, variis cæлатаque signis  
Pulcrius Arcadici quàm fagina pocula coloni:  
Miranturque dapes & regia fercula cœnæ.  
Non ibi cæpa rubens, fumoso cocta que lardo  
Rapa, vel instructas onerabat brassica mensas?  
Sed caro nescio quæ! panchæi cinnami odorem  
Latè diffundens: hic lancibus ora ferarum,  
Hic capita immani stabant & hiantia rictu.

Cœna  
Principis  
Illus.



Antè preces recitat puer & pro munera grates  
Accumulat, laudatque Deum qui talia terris  
Educat, pascatque homines tam divite dono.  
Post & confidunt mensis, lætiq; paratis  
Vescuntur dapibus, vinumque & pocula libant,  
Ordine athena locant alii, flammæque ministrant  
Pars calidos latices verubusque tremencia figunt,  
Cervorum terga & pingues cum matribus hædos  
In medio stat Sarconomus cultroque decentes  
Frangit, & appositas convivis dividit escas.  
Pars quoq; munda ferunt tonsis mantilia villis,  
Pars apulis onerant mensas, cereremq; canistris  
Expediunt, tostam carnem, pinguemque ferinam  
Supponunt alii cultros, vinumque ministrant,  
Craterasque replent; tum læta fronte ministri  
Innumeri magno distinguunt ordine curas,  
Pocula pars miscet, nunc hac nunc volvitur illoc,  
Turba frequens varios miscentq; per atria motus.  
Ante oculos, interq; manus sunt mitia poma;  
Vescuntur variisque beant convivia verbis  
Ingentes tollunt animos & gaudia fingunt  
PRINCIPIS & cytharæ resonat concentibus aula.  
Pamphagus & Dorceus & Trux cum Lalage Theron,  
Actæonque sagax & pingui ab domine Fassin,  
Ore canes præconciunt hæc gaudia mensæ,  
Expectantque gulæ si fors gallina voraci,

Canes ve-  
natici.

Seſe



Sese affata ferat, vel præmia certa laboris  
Asportent leporis crates aut tergora cervi,  
Præsentemq; famem nudo solantur odore,  
Ni fors objiciat fragrantia fercula naso,  
Tum capit ore cibos citius, quàm sæpe capistro  
Inflatum quis spectat onus atque aëra pullat,  
Sic docuit natura canes, quod sedula vix dum  
Post multos annos aliàs industria firmat.

Postquã exempra fames & amor compressus e  
Incipiunt horas multas traducere fando, (dendi,  
Et pateras magnas statuunt, Bacchūq; ministrāt.  
Jam litui, cantusq; sonant domus ampla resultat  
Lætitiâq; fremunt ædes ut júbila in ipsis  
Et pulsata tonant tibiçine tympana misto,  
Lætus & auditur concentus in arce tubarum  
Ærea blandisonâ raucedine cornua clangunt,  
Blandaq; ludentes modulantur carmina pleçtris;  
Tum verò celeri testudine doctus Iopas  
Personat, ingeminans cantū modulante catervâ,  
Innumerisq; sonis & vocibus æthera rumpit.  
Talibus atque aliis inter se longa trahebant  
Tempora; tunc in murmur lætæq; per atria voces  
Alta sonant, strepitu ingenti tectū omne repletur



Dant lucem flammæ & læto splendore coruscant.  
Tandē Dux surgens lecto sua membra recondit,  
Auratis recubans stratis pictisq; tapedis,  
Ipsū Magnates cytharâ resonante sequuntur.  
Nunc fessos abiens mox gurgite merfit Ibero  
Phœbus equos, tenebrasq; die fugiente reduxit;  
Illustrissimus ergò Dux suadentibus astris  
Concupit, placidumq; petit per membra soporē;  
Ast ubi mane novo roseos pulcherrimus ortus  
Lucifer extulerat, solisq; reduxerat æstum,  
Haud mora surrexit PRINCEPS sacra, templa fre-  
quentat

Seque suosque omnes puro de corde Jehovahæ  
Commendans grades solvit precibusq; serenis.  
Nunc justum & æquum est ut claudam carmi-  
na voto.

Conclu-  
sio.

Precatio.

O tu summe PATER, FILI dulcissime JESU,  
Tuque sacrum FLAMEN nostris succurito rebus;  
Inprimisq; DUCEM clementem NUMINE nostrum  
Protege ab adversis simul eripe & assere rebus;  
Dux hic noster AMOR, Dux hic insigne sororum  
Thespiadum columen, Dux hic tutamē honoris,  
Quem castis studiis Charites Musæq; merentur.

Dux



Dux hic solamen miseris, requiesq; camænis.  
Hoc Duce jam terris redeant saturnia regna,  
Pax terrasq; solumq; regat camposq; jacentes,  
Pacis amica Ceres ingenti obnubat amictu.  
Blanda; tranquillæ foveant nunc gaudia men-  
Diffugiatq; nefas belli claudantur iniqui (tes  
Templa, nec insidias metuat robustus arator,  
Et se virtutes sua per vestigia volvant.  
Cana fides, pietasq; viris qui jura reposedunt.  
Certa ferant, dubiosq; animos constantia firmet.  
Sic placeat superis sic jam surgentibus astris  
Inclinent sese sortes, & vota sequantur.  
Fervida sic felix patrias dominare per oras;  
O Dux magne Pater Patriæ, tua GLORIA VIVET  
Dum juga montis aper, dum flumina piscis ama-  
bit,

Dumq; thymo pascetur apis, dum cochlea rores;  
Donec in occasum roseo volventur ab ortu  
Sidera, donec erunt latices Aganippidos undæ.  
Inelyre Dux nostris succurrito rebus egenis,  
Macte animi pietate tui fortissime PRINCEPS.  
Te Patrem Patriæ tellus CALENBERGICA dicit,  
Illustris nunquam tali de germine PRINCEPS.

Deficiat



Deficiat, crescant redivivi florishonores,  
Et folia æternis non marcescentia seclis,  
Certè nunc omni celebrabitur ore GEORGUS  
Semper honos & nomen erunt laudesque GEORGI,  
Optabit populus felicia regna GEORGO  
Et colet ut cœli missum è regione GEORGUM:  
O præstans animi Princeps divine GEORGI,  
Sospite Te sospes sit patria terra GEORGO,  
Hoc omnes petimus repetito carmine FIAT,  
FIAT, vos FIAT, mecum geminate FAVENTES.

F I N I S.





*A.N. 309, 21.*

BR

Seren


DNO  
W

Dux Braur  
Clemen  
insti

M. LAU  
Caf. E

Typ

*Vorbereitung  
Willy*



ATIO

1503472

ceps es

GIUS  
US,

sis Dn. noster  
lenbergensis  
embri

NO, P.E.  
fectione

IMM

UNIVERSITÄTS-BIBLIOTHEK  
HALLE  
(SAALE)

*Dn. H. J. 9  
y 2000 Ann*

II n  
3123

